

Awadhi Easy-to-Read Version

Language: अवधी (Awadhi)

Provided by: Bible League International.

Copyright and Permission to Copy

Taken from the Awadhi Easy-to-Read Version © 2005 by Bible League International.

PDF generated on 2017-08-25 from source files dated 2017-08-25.

a1ae5774-2ca2-500b-8aeb-2c74229c4519

ISBN: 978-1-5313-1308-1

रूत

यहूदा मँ अकाल

१ बहुत समइ पहिले जब नाआवाधीसन क हुकुमत रही, तबहि एक बुरा समइ आवा कि भुइँया पइ अकाल पड़ि गवा। उहइ समइ मँ एलीमेलेक नाउँ क एक मनई यहूदा क बेतलेहेम क छोड़ दिहस। उ आपन मेहरारू अउ दुइ पूतन क संग मोआब क भुइँया मँ चला गवा। २ ओकरी मेहरारू क नाउँ नाओमी रहा अउ ओकरे पूतन क नाउँ महलोन अउ किल्योन रहेन। इ सबइ लोग यहूदा क बेतलेहेम क एप्राती परिवार स रहेन। इ परिवार मोआब क पहाड़ी प्रदेश क जात्रा किहेस अउ हुँवँइ बस गवा।

३ पाछे नाओमी क भतार एलीमेलेक मर गवा। एह बरे सिरिफ नाओमी अउ ओकर दुइ पूत बचे रहि गएन। ४ ओकर पूतन मोआब देस क मेहरारूअन क संग बियाह किहन। पहिला पूत क मेहरारू क नाउँ ओर्पा अउ दूसर पूत क मेहरारू क नाउँ रूत रहा। उ पचे मोआब मँ लगभग दस बरिस रहेन। ५ ओकर पाछे महलोन अउ किल्योन भी मर गएन। एह बरे नाओमी आपन भतार अउ पूतन क बिना अकेली हो गइ।

नाओमी अपने घरे जात ह

६ जब नाओमी मोआब क पहाड़ी भुइँया मँ रहत रही, तबहि नाओमी सुनेस कि यहोवा ओकरे लोगन क मदद किहेस ह। उ अपने लोगन क भोजन प्रदान करत ह। एह बरे नाओमी मोआब क पहाड़ी भुइँया क तजइ अउर आपन घर यहूदा मँ लउटइ क निहचइ किहेस। ओकर पतोहुअन भी ओकरे संग जाइ क निहचइ किहेन। ७ उ पचे उ प्रदेश क तजेन जहाँ उ पचे रहत रहिन अउर यहूदा कइँती लउटब सुरू किहन।

८ तब नाओमी आपन पतोहुअन स कहेस, “तू दुइनउँ क अपने घर आपन महतारिन क घरे लउट जाइ चाही। तू पचे मोरे पूतन क बरे बहोतइ दयालु रहिउँ ह। यहोवा तोह पइ दयालु होइ। ९ तउ मई पराथना करत हँ कि यहोवा, अच्छा भतार अउ नीक घर पावइ मँ तू दुइनउँ क मदद करइ।” नाओमी आपन पतोहियन क पियार किहेस अउ उ पचे सबहि रोवइ लागिन।

१० तब पतोहियन कहेन, “किन्तु हम आप क संग चलइ चाहित ह अउर आप क लोगन मँ जाइ चाहिन ह।”

११ किन्तु नाओमी कहेस, “नाहीं, बिटियो, अपने घरे लउटि जा। तू पचे मोरे संग काहे जाबिउ? मई तू पचन क मदद नाहीं कइ सकिन। मोरे लगे अब कउनो पूत नाहीं जउन तोहार संग बियाह कइ सकइ। १२ अपने घरे लउटि जा। मई एतनी बुद्धिया अहँ कि नवा भतार नाहीं रखि सकिन। हिआँ तलक कि जदि मई फुन बियाह करइ क बात सोचउँ, तउ भी मई तोहार पचन्क मदद नहीं कइ सकित। जदि मई आजु क राति ही गर्भवती होइ जाउँ अउर दुइ पूतन क पइदा करउँ, तउ भी एहसे तोहार पचन्क मदद नाहीं मिली। १३ बियाह करइ स पहिले ओनकर बालिग होइ तलक तू पचन्क इंतजार करइ पड़ी। मई तू पचन्स एतने लम्बे समइ तलक बिना भतारे क पूरतीच्छा नाहीं करवाउब। एहसे मोका बहोत दुःख होइ। मई पहिले स ही बहोत दुःखी हँ काहेकि यहोवा मोरे खिलाफ बहोत कछु कइ दिहस ह।”

१४ एह बरे मेहरारूअन बहोत रोइन। तब ओर्पा नाओमी क चूमेस अउ उ चली गइ। किन्तु रूत ओका बाहन मँ गहियाइ लिहस अउर ओकरे लगे ठहर गइ।

१५ नाओमी कहेस, “लखा, तोहार जेठानी आपन लोगन अउ आपन देवतन मँ लउट गइ। एह बरे तोहका ही उहइ करइ चाही।”

१६ किन्तु रूत कहेस, “आपन क तजिके मोका मजबूर जिन करा। आपन लोगन मँ लउटइ बरे मोका मजबूर जिन करा। मोका अपने संग चलइ द्या। जहाँ कहुँ तू जाबिउ मई जाब। जहाँ कहुँ तू सोउबिउ, मई सोउब। तोहार लोग मोर लोग होइहीं। तोहार परमेस्सर मोर परमेस्सर होइ। १७ जहाँ तू मरबिउ, मई भी हुआइँ मरब अउर मई हुबइँ दफनाई जाब। होइ सकत ह यहोवा हमरे बरे इ करी, अउर होइ सकत ह एँह स भी जियादा, जब तलक कि मउत हम लोगन क जुदा न कइ द्या।”

घरे लउटब

१८ नाओमी लखेस कि रूत क ओकर संग चलइ क प्रबल इच्छा अहइ। एह बरे नाओमी ओकरे संग बहस करब बन्द कइ दिहस। १९ फुन नाओमी अउर रूत तब तलक जात्रा किहन जब तलक उ पचे बेतलेहेम नाहीं पहुँच गइन। जब दुइनउँ मेहरारूअन बेतलेहेम पहुँचिन तउ सबहि लोग

बहोत उत्तेजित भएन। उ पचे कहब सुरू किहन,
“का इ नाओमी अहइ?”

२० मुला नाओमी लोगन स कहेस, “मोका नाओमी जिन कहा, मोका मारा कहा। काहेकि सर्वसक्तीमान परमेस्सर मोर जिन्गी क बहोत दुःखी बनाई दिहस ह। २१ जब मई गइ रहिउँ, मोरे लगे उ सबइ चिजियन रहिन जेनका मई चाहत रहिउँ। किन्तु अब, यहोवा मोका खाली हाथे धरे लियावा ह। यहोवा मोका दुःखी बनाएस ह। एह बरे मोका ‘नाओमी’ काहे कहत अहा? सर्वसक्तीमान परमेस्सर मोका बहोत जियादा कस्ट दिहस ह।”

२२ इ तरह नाओमी अउ ओकर पतोहू रूत मोआबी मेहरारू मोआब क भुइया स लउटि गएन। इ दुइनउँ मेहरारूअन जौ क कटती क समइ यहूदा क बेतलेहेम मँ आइन।

रूत क बोअज़ स मिलन

२ बेतलेहेम मँ एक टु धनी मनई रहत रहा। ओकर नाउँ बोअज़ रहा। बोअज़ एलीमेलेक परिवार स नाओमी क निअरे रिस्तेदारन मँ स एक रहा।

२ एक दिना रूत (मोआबी मेहरारू) नाओमी स कहेस, “मई सोचत हउँ कल्ह मई खेतन मँ जाउँ। होइ सकत ह कि कउनो अइसा मनई मोसे मिलइ जउन मोह पइ दाय़ा कइके, मोरे बरे उ अन्न क बटोरइ देइ जेका उ आपन खेत मँ तजत होइ।”

नाओमी कहेस, “बिटिया, ठीक अहइ जा।”

३ एह बरे रूत खेतन मँ गइ। उ फसल काटइ वाले मजदूरन क पाछे चलत रही अउर उ अन्न बटोरेस जउन तज दीन्ह गवा रहा। अइसा भवा की उ खेते क एक हीसा एलीमेलेक परिवार क एक मनई बोअज़ क रहा।

४ पाछे, बेतलेहेम स बोअज़ खेत मँ आवा। उ आपन मजदूरन क हालचाल पूछेस। उ कहेस, “यहोवा तोहरे संग होइ।”

मजदूरन जबाब दिहन, “यहोवा आप क आसीबाद देइ।”

५ तब बोअज़ आपन उ सेवक स बातन किहेस, जउन मजदूरन क निरीच्छक रहा। उ पूछेस, “बिटिया केकर अहइ?”

६ सेवक जबाब दिहस, “इ उहइ मोआबी मेहरारू अहइ जउन मोआब क पहाड़ी पहाटा स नाओमी क संग आई अहइ। ७ उ बहोत भिन्सारे आइ अउ मोहसे उ पूछेस कि का मई मजदूरन क पाछे चल सकत हउँ अउ भुइयाँ पइ छिटके अन्न क बटोरा

सकत हउँ। उ तउ तलक स काम करत रहत हीं, किन्तु उ तनिक देरी बरे आसुरय स्थान मँ रही।”

८ तब बोअज़ रूत स कहेस, “हे मोर बिटिया, सुना! तू अपने बरे अन्न बटोरइ बरे मोरे खेते मँ रहा। तोहका कउनो दूसर मनई क खेत मँ जाइ क जरूरत नाही अहइ। मोर मेहरारू नउकरन क पाछे चलत रहा। ९ इ धियान मँ रखा की उ पचे कउने खेते मँ जात अहइ अउर ओनकर अनुसरण करा। मई नउजवानन क चितउनी दइ दिहे अहउँ कि उ पचे तोहका परेसान न करई। जब तोहका पियास लगइ, तउ उहइ गगरी स पानी पिआ जेहसे मोर मनई पानी पिअत हीं।”

१० तब रूत प्रणाम करइ आने धरती तलक निहुरी। उ बोअज़ स कहेस, “मोका अचरज अहइ कि आप मोह पइ धियान दिहेन। मई एक अजनबी अहउँ, किन्तु आप मोह पइ बड़ी दाय़ा किहेन ह।”

११ बोअज़ ओका जबाब दिहेस, “मई ओन सारी मदद क जानत हउँ जउन तू आपन सास नाओमी क दिहे ह। मई जानत हउँ कि तू ओकर मदद तब भी किहे रह्या जब तोहार भतार मर गवा रहा अउर मई जानत हउँ कि तू आपन महतारी-बाप अउ आपन देस तजिके इदेस मँ हिआँ आइ अहा। तू इ देस क कउनो भी मनई क नाही जानतिउ, फिन भी तू हिआँ नाओमी क संग आइउ। १२ यहोवा तोहका ओन सबहि नीक कामे बरे इनाम देई जउन तू किहा ह। यहोवा इस्राएल क परमेस्सर तोहका भरपूर इनाम देइ। तू ओकरे सुरच्छा क ओढ़ना मँ आसरा बरे आइ अहा।”

१३ तब रूत कहेस, “आप मोह पइ बडे दयालु अहइ, महोदय। मई तउ सिरिफ एक दासी अहउँ। मई आप क सेवकन मँ स भी कउनो क बराबर नाही अहउँ। किन्तु आप मोका दाय़ा स भरी बातन किहा ह। अउर मोका सान्त्वना दिहा ह।”

१४ दुपहरिया क भोजन क समइ, बोअज़ रूत स कहेस, “हिआँ आया। हमरी रोटियन मँ स कछू खा। एह कइती हमरे सिरकें मँ आपन रोटी बोझा।”

तब रूत मजदूरन क संग बठइ गइ। बोअज़ ओनका कछू भूँजा भवा अनाज दिहन। रूत जेतना चाहत रहा ओतना खाएस अउर कछू भोजन बचि गवा। १५ तब रूत उठी अउर काम करइ लउटी।

तब बोअज़ आपन सेवकन स कहेस, “रूत क आन्त क ढेरी क लगे भी अन्न बटोरइ या। ओका जिन रोका। १६ ओकरे काम क, ओकरे बरे कछू दाना स भरी बालन गिराइके, हलका करा। ओका उ अन्न क बटोरइ या। ओका रोकइ बरे जिन कहा।”

नाओमी बोअज़ क बारे मँ सुनत ह

१७ रूत साँझ तलक खेत मँ अनाज एकट्टा किहस। तब उ भूसा स अन्न क अलग किहस। उ लगभग आधा बुसल जौ जमा किहस। १८ रूत उ अन्न क आपन सास क इ देखावइ बरे लइ गइ कि उ केतना अन्न बटोरैस ह। उ ओका उ भोजन भी दिहस जउन दुपहर क भोजन मँ स बन गवा रहा। रूत उ अन्न क अपनी सास क देखावइ बरे लइ गइ कि उ केतना अन्न बटोरैस ह। उ मोका भोजन भी दिहस जउन दुपहरिया क भोजन मँ स बच गवा रहा।

१९ ओकर सास ओहसे पूछैस, “इ अन्न तू कहाँ स बटोर्या ह? तू कहाँ काम किहा? जउन मनई तोहका सूचना दिहैस आसीबाद पाइ।”

तब रूत ओका बताएन कि उ केकरे संग काम किहे रही। उ कहेस, “जउने मनई क संग मई आजु काम किहे रहेउँ, ओकर नाउँ बोअज़ अहइ।”

२० नाओमी अपनी पतोहू स कहेस, “यहोवा ओका आसीबाद देइ। यहोवा सबहि पइ निरन्तर दाया करत रहत ह चाहे उ पचे जिअत होइ या मरा होउँ।” तब नाओमी आपन पतोहू स कहेस, “बोअज़ हमारे संबन्धियन मँ स एक अहइ। बोअज़ हमार संरच्छक *मँ स एक अहइ।”

२१ तब रूत कहेस, “बोअज़ मोका वापस आवइ अउर काम करइ क भी कहेस ह। बोअज़ कहेस ह कि मई सेवकन क संग तब तलक काम करत रहउँ जब तलक फसल क कटाई पूरी नाहीं होइ जात।”

२२ तब नाओमी अपनी पतोहू रूत स कहेस, “इ नीक अहइ कि तू ओकरी दासियन क संग काम करत रहा। जदि तू कउनो दूसर क खेत मँ काम करबिउ तउ कउनो मनई तोहका कउनो नोस्कान पहाँचाइ सकत ह।” २३ एह बरे रूत बोअज़ क मेहररू नउकरन क संग काम करत रही। उ तब तलक अन्न बटोरैस जब तलक फसल क कटाई पूरी नाहीं भई। उ हुवाँ गोहूँ क कटनी क आखिर तलक भी काम किहस। रूत आपन सास क संग रहत रही।

खरिहान

३ १ तब रूत क सास, नाओमी ओहसे कहेस, “हे मोर बिटिया, होइ सकत ह कि मई तोहरे बरे

एक ठु नीक भतार अउर घर पाइ सकउँ! तउ मई तोहार बरे नीक होब। २ बोअज़ उपयुक्त मनई होइ सकतेन? बोअज़ हमार निचके क सम्बन्धी अहइ। तू ओकरी दासियन क संग काम किहा ह। आजु राति उ खरिहाने मँ काम करत रहा होइ। ३ जा, नहा अउर नीक ओढ़ना पहिरा। मटकउना द्रव्य लगावा अउर खरिहाने मँ जा। किन्तु बोअज़ क समन्वा तब तलक जिन पड़ा जब तलक उ राति क भोजन न कइ लेइ। ४ खइया क खाइ क पाछे, उ अराम करइ बरे ओलरी। लखत रहा जेहसे तू इ जान सका कि उ कहाँ सोवत ह। हुवाँ जा अउर ओकरे गोड़े क ओढ़ना उधारा। तब ओलरी जा। उ तोसे कहब्या तोहका का करी चाही।”

५ तब रूत जवाब दिहस, “आप जउन करइ क कहति अहा, मई करवेउँ।”

६ एह बरे रूत खरिहाने मँ गइ। रूत उ सब किहस जउन ओकर सास ओहसे करइ क कहेस। ७ खाइ अउर पिअइ क पाछे, बोअज़ बहोत संतुट्ट रहा। बोअज़ अन्न क ढेर क लगे ओलरइ गवा। तब रूत बहोत धीमे स ओकरे लगे गइ अउर उ ओकरे गोड़े क ओढ़न उधार दिहस। रूत ओकरे गोड़े क बगल मँ ओलर गइ।

८ करीब आधी रात क बोअज़ नींद मँ आपन करवट बदलेस अउर उ जाग पड़ा। उ बहोत चकित भवा। ओकरे गोड़न क निचके एक ठु मेहरारू ओलरी रही। ९ बोअज़ पूछैस, “तू कउन अहा?”

उ कहेस, “मई तोहार नउकर लइकी रूत अहउँ। आपन संरच्छा क ओढ़ना मोरे ऊपर फइला द्या। तू मोर रच्छक अहा।”

१० तब बोअज़ कहेस, “हे जुवती, यहोवा तोहका आसीबाद देइ। तू मोह पइ बिसेस कृपा किहा ह। तोहार इ कृपा मोरे बरे ओहसे भी जियादा अहइ जउन तू सुरूआत मँ नाओमी क बरे देखाए रह्या। तू बियाह बरे कउनो भी धनी या गरीब नउजवान क खोज कइ सकत रहिउँ, मुला तू वइसा नाहीं किहा। ११ जुवती, अब डेराअ नाहीं। मई उहइ करब जउन तू चाहति अहा। मोरे नगर क सबहि लोग जानत हीं कि तू एक ठु नीक मेहरारू अहा। १२ अउर इ फुरि अहइ, कि मई तोहरे परिवार क निचके क सम्बन्धी अहउँ। मुला एक दूसर मनई अहइ जउन तोहरे परिवार क मोहसे भी जियादा निचके क सम्बन्धी अहइ। १३ आजु क राति हिअँइ ठहरा। भिन्सारे हम

*२ :२० संरच्छक “कस्ट स मुक्ती देइवाला।” उ मनई जउन मृत मनई क सम्बन्धियन क देखरेख अउ रच्छा करत ह। इ कबहुँ कबहुँ अपने गरीब सम्बन्धी क वापस खरीदके दासता स अजाद (कस्ट क छुटकारा) करावइवाला हीत ह।

पता लगाउब कि का उ तोहार मदद करी। जदि उ तोहका मदद देइ क फैसला लेत ह तउ बहोत नीक होइ। जदि उ तोहार मदद करइ स इन्कार करत ह, तउ यहीवा क जिन्नगी क सपथ लेइके मई प्रतिज्ञा करत हउँ कि मई तोहसे बियाह करब अउर एलीमेलेक क भुईया क तोहरे बरे बेसाही के लउटाउब। एह बरे भिसारे तलक हिअँइ सोआ रहा।”

१४ एह बरे रूत बोअज्र क गोड़े क लगे भिसारे तलक ओलरी रही। उ अँधियारा रहत ही उठी, एहसे पहिले क एतना प्रकास होइ कि लोग एक दूसरे क पहिचान सकइँ।

बोअज्र ओहसे कहेस, “हम एका कउनो क इ नाही बताउब कि तू पिछली रात हिआँ मोर लगे आई रहिउ।” १५ तब बोअज्र कहेस, “आपन ओढ़नी मोरे लगे लिआवा। अब, एका फइलाइके राखा।”

एह बरे रूत आपन ओढ़नी क फइलाइके राखेस अउर बोअज्र लगभग एक बसल जौ ओकरी सास नाओमी क उपहार मँ दिहस। तब बोअज्र ओका रूत क ओढ़नी मँ बाँध दिहस अउर ओका ओकरी पीठ पइ रख दिहस। तब उ नगर क गवा।

१६ रूत आपन सास, नाओमी क घर गइ। नाओमी दुआरे पइ आई अउर उ पूछेस, “बाहेर कउन अहइ?”

रूत घरे क भीतर गइ अउर उ नाओमी क हर बात जउन बोअज्र किहे रहा, बताएस। १७ उ कहेस, “बोअज्र इ जौ उपहार क रूप मँ तोहका दिहस ह। बोअज्र कहेस कि आप क बरे उपहार लिए बिना मोका घर नाही जाइ चाही।”

१८ नाओमी कहेस, “हे मोर बिटिया, तब तलक धीरा राख जब तलक हम इ सुनी कि का भवा। बोअज्र तब तलक आराम नाही करी जब तलक उ ओका नाही कइ लेत जे ओका करइ चाही। हम लोगन क दिन बीतइ क पहिले मालूम होइ जाइ कि का होइ।”

बोअज्र तथा दूसर सम्बन्धी

१ बोअज्र उ ठउरे पइ गवा जहाँ नगर दुआरे पइ लोग एकट्ठा होत ही। बोअज्र तब तलक हुआँ बइटा रहा जब तलक उ संरच्छक हुवाँ स नाही गुजरा जेकर जिकर बोअज्र रूत स किहे रहा। तब बोअज्र ओका बोलाएस, “हिआँ आवा मित्तर! हिआँ बइटा।” यह बरे उ हुआँ बइटेस।

२ तब बोअज्र हुआँ गवाहन क बटोरेस। बोअज्र नगर क दस बुजुगन क बुलाएस। उ कहेस, “हिआँ बइटा!” एह बरे उ पचे हिआँ बइठ गएन।

३ तब बोअज्र उ संरच्छक स बातन किहस। उ कहेस, “नाओमी मोआब क धरती स लउट आइ अहइ। उ भुईया क एक टूका बेचेस ह। जउन हमरे सम्बन्धी एलीमेलेक क रहेन। ४ मई तय किहेउँ ह कि मई इ बिसय मँ हिआँ क बसइया लोगन अउर आपन बुजुगं लोगन क समन्वा तोहसे कहउँ। अगर तू इ भुईया क मुत्य वापिस लइ क चाहत ह तउ एका खरीद ल्या। अगर तू इ भुईया क वासप नाही खरीदइ चाहत ह तउ मोका कहा। मई जानत हउँ कि तोहरे पाछे उ मनई मई ही हउँ जउन भुईया क खरीद सकत हउँ। जदि तू उ भुईया क नाही खरीदब्या, उ मई हउँ जउन ओका खरीदब।”

तब उ मनई जवाब दिहस, “मई इ भुईया क खरीदब।”

५ तब बोअज्र कहेस, “जदि तू भुईया नाओमी स बेसहब्या तउ तोहका मृतक क मेहरारू, मोआबी मेहरारू रूत भी मिली। जब रूत क पूत होइ तउ उ भुईया उ पूत क होइ। इ तरह भुईया मृतक क परिवार मँ ही रही।”

६ निचके क सम्बन्धी जवाब दिहस, “मई भुईया क वापस बेसहि नाही सकत। जदपि इ भुईया मोर होइ चाही किन्तु मई एका बेसही नाही सकत। जदि मई अइसा करत हउँ तउ मोका आपन सम्पत्ति स हाथ धोऊब पइ सकत ह। एह बरे तू उ भुईया क बेसहि सकत ह।” ७ (इस्राएल मँ बहोत समइ पहिले जब कउनो मनई कउनो सम्पत्ति क बेसहत, छुड़ावत या सम्पत्ति क बदलि करत रहा, तउ एक मनई आपन जूता क उतारत रहा अउर दूसर मनई क दइ देत रहा। इ ओनके बेसहइ क प्रमाण रहा।) ८ तउ उ निचके क सम्बन्धी बोअज्र स कहेस, “भुईया तू आपन बरे बेसही लइ!” तउ उ आपन एक जूता क उतारेस अउर एका बोअज्र क दइ दिहस।

९ तब बोअज्र बुजुगन अउ सबहि मनइयन स कहेस, “आजु आप लोग मोरे गवाह अहउँ कि मई नाओमी स उ सबइ सबहि चिजियन खरीदत हउँ जउन एलीमेलेक, किल्योन अउ महलोन क अहइ। १० मई रूत क भी आपन मेहरारू बनावइ बरे बेसहत हउँ। मई इ एह बरे करत अहउँ कि मृतक क सम्पत्ति ओकरे परिवार क लगे ही रही। इ तरह मृतक क नाउँ ओकरे परिवार अउ ओकरी भुईया स नाही हटावा जाइ। आप लोग आजु एकर गवाह अहइ।”

११ इ तरह सबहि लोग अउर बुजुर्गन जउन नगर दुआर क समीप रहेन, गवाह भएन। उ पचे कहेन, “इ मेहरारू जउन तोहरे घर जाई, यहोवा ओका राहेल अउ लिआ जइसी करइ जउन इस्राएल बंस क बनाएस। हम पराथना करित ह तू एप्राता मँ सकितसाली ह्वा! तू बेतलेहेम मँ प्रसिद्ध ह्वा। १२ जइसे तामार यहूदा क पूत पेरेस क जनम दिहेस अउर ओकर परिवार महान बना। उहइ तरह यहोवा तोहका भी रूत स कई पूत देइ। अउर तोहार परिवार भी ओकरी तरह महान होइ।”

१३ इ तरह बोअज़ रूत स बियाह किहेस। यहोवा रूत क गर्भवती होइ दिहेस अउर रूत एक ठु पूत क जन्म दिहेस। १४ नगर क मेहररूअन नाओमी स कहेन, “उ यहोवा क आभार माना जउन तोहका अइसा संरच्छक दिहेस। यहोवा करइ उ, इस्राएल मँ प्रसिद्ध होइ। १५ उ तोहका फुन स जवान बनाइ देइ। अउर बुढापे मँ उ तोहार धियान राखी। तोहरी बहू क कारण इ घटना घटी अहइ। उ इ बच्चा तोहरे बरे गर्भ मँ धारण किहेस उ तोहसे पिआर करत ह, अउर उ तोहरे बरे सात बेटन स जियादा उत्तम अहइ।”

१६ नाओमी लरिका क लिहस, ओका आपन बाहन मँ उठाइ लिहस, अउर ओकर पालन-पोसण किहेस। १७ पड़ोसियन बच्चा क नाउँ राखेन। ओन मेहररूअन कहेन, “अब नाओमी क लगे एक पूत अहइ।” पड़ोसियन ओकर नाउँ ओबेद राखेन। ओबेद यिसै क बाप रहा अउर यिसै, दाऊद क बाप रहा।

रूत अउ बोअज़ क परिवार

१५ पेरेस क परिवार क बंसावली इ अहइ :
पेरेस हिस्रोन क बाप रहा।
१९ राम क बाप हिस्रोन रहा।
अम्मीनादाब क बाप राम रहा।
२० नहसोन क बाप अम्मीनादाब रहा।
सल्मोन क बाप नहसोन रहा।
२१ बोअज़ क बाप सल्मोन रहा।
ओबेद क बाप बोअज़ रहा।
२२ यिसै क बाप ओबेद रहा।
दाऊद क बाप यिसै रहा।